

1390

Na osnovu čl. 16. i 61. stav (2) Zakona o upravi ("Službeni glasnik BiH", br. 32/02, 102/09 i 72/17), čl. 14. i 103. stav (2) Zakona o zrakoplovstvu Bosne i Hercegovine ("Službeni glasnik BiH", br. 39/09 i 25/18) i Odluke o uspostavljanju Programa sigurnosti civilnog zrakoplovstva Bosne i Hercegovine ("Službeni glasnik BiH", broj 32/24), a u vezi sa tačkom 6.2 Programa sigurnosti civilnog zrakoplovstva Bosne i Hercegovine ("Službeni glasnik BiH", broj 32/24), generalni direktor Direkcije za civilno zrakoplovstvo Bosne i Hercegovine donosi

**ODLUKU
O USPOSTAVLJANJU MODELA PROGRAMA
SIGURNOSTI AERODROMA**

Član 1.

(Predmet)

- (1) Ovom odlukom uspostavlja se model za izradu Programa sigurnosti aerodroma s ciljem njegove usklađenosti sa Programom sigurnosti civilnog zrakoplovstva Bosne i Hercegovine ("Službeni glasnik BiH", broj 32/24), Zakonom o zrakoplovstvu Bosne i Hercegovine ("Službeni glasnik BiH", br. 39/09 i 25/18) i podzakonskim aktima donesenim na osnovu tog zakona.
- (2) Model Programa sigurnosti aerodroma nalazi se u Prilogu ove odluke i čini njen sastavni dio.
- (3) Prilog iz stava (2) ovog člana sadrži Aneks III-3-A ECAC Doc 30 i dijelove ICAO Doc 8973 koji su povjerljive prirode i ne objavljuju se u "Službenom glasniku BiH".

Član 2.

(Upotreba roda)

Riječi koje su radi preglednosti u ovoj odluci navedene u jednom rodu bez diskriminacije odnose se i na muški i na ženski rod.

Član 3.

(Program sigurnosti aerodroma)

- (1) Programom sigurnosti aerodroma opisuju se metode i postupci koje operator aerodroma primjenjuje u skladu sa propisima iz člana 1. stav (1) ove odluke s ciljem zaštite putnika, posade, osoblja koje vrši usluge opsluživanja na zemlji, zrakoplova, objekata i posjetitelja aerodroma od akata nezakonitog ometanja.
- (2) Program sigurnosti aerodroma sastoji se od opšteg dijela i priloga koji čine jedinstven dokument i takvi se primjenjuju i tumače.
- (3) Prilozima Programa sigurnosti aerodroma utvrđuju se detaljne mjere za primjenu Priloga ove odluke.

Član 4.

(Sadržaja modela Programa sigurnosti aerodroma)

- (1) Model Programa sigurnosti aerodroma iz Priloga ove odluke sadrži elemente potrebne za izradu Programa sigurnosti aerodroma.
- (2) Operator aerodroma koristi Model iz stava (1) ovog člana za izradu vlastitog Programa sigurnosti aerodroma.
- (3) U Programu sigurnosti aerodroma mogu biti izostavljeni dijelovi iz Priloga ove odluke za koje operator aerodroma dostavi adekvatno obrazloženje i/ili dokaze da isti nisu primjenjivi iz objektivnih i/ili operativnih razloga.
- (4) Za izradu Programa sigurnosti aerodroma, operator aerodroma može koristiti smjernice iz dokumenata ECAC Doc 30 i ICAO Doc 8973.

Član 5.

(Postupak i način dostavljanja)

U skladu s odredbama Zakona o zaštiti tajnih podataka ("Službeni glasnik BiH", br. 54/05 i 12/9) i podzakonskim aktima donesenim na osnovu tog zakona, Direkcija za civilno

zrakoplovstvo Bosne i Hercegovine, na zahtjev operatora aerodroma ili nadležnih organa i tijela Bosne i Hercegovine, dostavlja Prilog iz člana 1. stav (2) ove odluke.

Član 6.

(Određivanje stepena tajnosti)

- (1) Operator aerodroma, u skladu s odredbama Zakona o zaštiti tajnih podataka ("Službeni glasnik BiH", br. 54/05 i 12/9), dužan je zaštititi sadržaj Programa sigurnosti aerodroma od neovlaštenog pristupa i korištenja.
- (2) Program sigurnosti aerodroma, čija priroda i sadržaj teksta to zahtijeva, klasifikuje se oznakom "Interno-Restricted".
- (3) Prilozi Programa sigurnosti aerodroma, čija priroda i sadržaj teksta to zahtijevaju, klasifikuju se oznakom "Povjerljivo-Confidential".

Član 7.

(Stavljanje propisa van snage)

Stupanjem na snagu ove odluke, prestaje da važi Odluka, broj: 01-29-8-327-1/08 od 31.1.2008. godine.

Član 8.

(Stupanje na snagu i primjena)

- (1) Ova odluka stupa na snagu osmog dana od dana objavljivanja u "Službenom glasniku BiH".
- (2) Operator aerodroma dužan je u roku od 60 dana od dana stupanja na snagu ove odluke ispuniti zahtjeve utvrđene ovom odlukom i uskladiti Program sigurnosti aerodroma sa Prilogom ove odluke.

Broj 1-3-02-2-917-6/24

26. decembra 2024. godine
Banja Luka

Generalni direktor
Zorislav Ivanović